



## 笑死程咬金 噉死程鐵牛

笑死程咬金，噉死程鐵牛，係講唐朝大將程咬金、裴元帥、程鐵牛，一個歡喜到笑死，一個係傷心到噉死，一家人旋風之間，就死忒兩儕，實在係非常不幸个事情，可見，笑、噉過度，正經會收命。

但是對百零歲个人來講，佢个笑死，可能係一種福氣，該就係經過六隻皇帝个元老大將程咬金。唐朝个程咬金當肯幫助人，又好替人出頭，聽講村肚一個浪蕩子不孝厥姆，程咬金就派人撈佢捉來，打了四十大板以後，咄服，後來變成孝子。程咬金還教佢當多手藝，變做佢个徒弟，得著大家阿腦，佢也當歡喜。

程咬金人緣盡好，官運當順，經過唐朝高宗、太宗、武則天到睿宗等六隻皇帝，實在了不起。聽講，有一擺做生日，來分佢請个貴賓官員、親朋好友、隔壁鄰舍，這兜人客个車隊，排到堆山塞海，佢在自家个樓頂看啊去，哇！不得了，看到濛線還看毋擘，佢想這一生人，實在已值咧，一下暢起來，忍毋核就大笑，笑無停，嘴擘緊笑，經過當久，嘴還盲合轉去。

厥來仔程鐵牛，看著阿爸嘴擘毋會停動，感覺著奇怪，仰笑該恁久？斯將手伸到厥爸个鼻空頭，正知無敵氣變仙咧！哎！仰結煞？恁多達官貴人，全部都愛來拜壽，對人客愛仰般交代？一時之間嘎戇忒，突然大噉起來，噉到噉殺天，一下仔嘎噉死忒咧！一瞞目之間，屋下人一儕笑死，一儕噉死，害著大家春上跌落，無結無煞，正經係「出山仔，堵著討新娘——片噉，一片笑，鴨嘛打孔翹。」

也有人講程咬金毋係做生日時死忒，係在薛家三百零儕滿門抄斬，中宗皇帝復位，廢了武則天，在鐵丘墳前斬了奸臣，薛家冤屈得著平反以後。看著佢歸隻家族个冤屈全部洗清，武則天也下臺，自家經過恁多隻皇帝，這下當享受人生最好个福氣。哇！越想越歡喜，這毋係「車過山前必有路，船到灘頭水路開」。斯哈哈大笑起來，一笑就笑無停，結果嘎笑死咧。正經係「無愁無慮食百二，無打無擊食百一」，俵仔看著阿爸無意無思就死忒，自家也噉死咧。

佢兩子爺，係歷史上唯一共日，一個笑死、一個噉死个特殊案件。表面上看起來係不幸，但是對程咬金來講，可能係一種福氣，可以講係五福臨門啊！所謂五福，就係長壽、富貴、康寧、攸好德、考終命等五種，程咬金全有。佢食到 128 歲，厥來仔食到 108 歲，已長命咧。做過六朝元老，過著安寧快樂个日仔。一生人常做好事，又在人危難時節去幫助人，所以安到「半路殺出程咬金」，係有德个人啊！在這人生个高峰，無病無痛，一笑就死忒，人講「無求好生，但求好死」，正經係含笑九泉，恁好死，該還有麼个遺憾呢？

笑、噉，對後生人來講，固然愛節制。但是，笑死程咬金，噉死程鐵牛，對兩子爺都食到百零歲个人來講，實在係積善之家有餘慶啊！一方面講程咬金福壽全歸，一方面講程鐵牛係孝子不匱，正經係忠孝傳家久，詩書繼世長。

作者：何石松

### ☆詞彙學習☆

【咄服】dod fug`：心悅誠服的意思。

【噉殺天】ve fong sad tien`：大聲哭喊、

【考終命】kau` zhung` miang+：高壽歸西。

聲嘶力竭。